

摘藻堂四庫全書薈要

集部

欽定四庫全書薈要

集部

明詩綜卷二十五



詳校官編修臣王天祿

欽定四庫全書薈要卷二萬四百九十八

集部

明詩綜卷二十五

翰林院檢討朱彝尊編

楊翥 二首

翥字仲舉吳縣人少與兄戍武昌為鄉校師仁  
宗驛召授翰林編修歷修撰遷郎府長史景泰  
初擢禮部左侍郎尋進尚書有晞顏先生集

陳綢

云先生詩若太羹玄酒不

待薑桂鹽梅而至味自存

黃岡阻雪

積雪既淫溢飛雪何漫漫經旬苦不止行子多悲酸悲  
酸亦何事匪為饑與寒倚門累晨暮定省違承顏欲行  
阻泥塗欲濟愁驚湍凍木號江介饑鳥噪林端向風長  
太息恨不生羽翰出門不自遂誠哉行路難

秋懷

肅肅涼吹發唧唧寒蛩吟春夏不自豫况乃秋氣臨時  
序忽流邁感此百憂尋人生誠須臾華髮易為侵立名

亦素志為善實所欽塵事日紛擾進修力不任愁懷難  
自遣徙倚高梧陰

靜志居詩話晞顏集借之琴川毛氏有以為施  
鉛評云宜亟焚毀勿暴其短於後世可也未免  
太過楊公長者當存其言  
以予所錄二首亦自成章

### 范澄一首

澄字國清寶應人景泰庚午舉人

### 送別

酒盡津鼓喧風生浦帆亂山迴不見君夕陽在沙岸

柯 潛一首

潛字孟時莆田人景泰辛未賜進士第一授翰林修撰歷右春坊右中允洗馬遷尚寶少卿陞詹事府少詹事兼翰林學士有竹巖集

詩話漢有金馬石渠蘭臺東觀宋有總明陳有德教周則虎門麟趾北齊則仁壽文林唐則麗正集仙開元中始定為翰林院其署與他公廨不同中有徘徊精舍四面步廊畫壁花塼假山叢竹侈金鑾之密記建學士之新樓汴宋玉堂尤如藻飾泊乎南渡雖屬偏安而省舍一新濯纓之泉滌硯之澗芸香之亭汗青之軒以及蓬萊松坡蘭畦芝館藥洞菊徑橘洲鶴砌儲圖史

翰墨於中故論者以詞臣為神仙之職也明初  
舊院有修竹林學士黃宗豫寄東里詩云一別  
詞垣數月餘娟娟修竹近何如北京既建院設  
玉河橋西堂後有井劉文安所鑿也亭二間凡  
八楹柯學士所築也井在左亭居右至今入翰  
苑者以劉井柯亭為佳話而堂後柏二株亦學  
士所植李長沙選館受業於柯後李教習庶常  
以學士柏為題汪吉士俊有一日百回行樹底  
之句李悵然有惑行為長歌云我行樹陰日千  
匝雨葉風枝自蕭颯惟有諸生識我情旁人不  
許空嘲狎我見先生種樹年我身尚短樹及肩  
枝蟠江山地可縮手幹造化天無權瓊臺翠閣  
何森爽院柳庭花敢爭長茫茫陰長留六月陰盤  
空直與孤雲上材堪五鳳難為用根列九泉終  
不枉零落青袍幾故人瑄琮玉珮空遺響當時  
院長文安公柯亭劉井相西東百年遺愛豈獨

此此樹欲比人中龍柏猶如此我何似已媿斑  
白非兒童名收棖栢有先後壽比金石無終窮  
下堂再拜想顏色仰面正拂長髯風於是倡和  
成卷以貽學士之子使藏焉蓋學士汲引後進  
孜孜如不及二百年來人猶勿翦勿拜至今想  
其文采風流僕嘗思文獻可徵而詞林掌故闕  
然不講往在中禁日會粹玉堂舊事自唐宋迄  
明撰瀛洲道古錄一編弟子長洲陸肯堂請事  
開雕謂刊成凡入院者必給一本庶知以古人  
自期斯文不幸陸生云亡至今藏之篋行恐終  
歸覆醬可  
歎惜也

# 游囊山寺

下馬松關外行行過虎溪鐘鳴知寺近雲暝覺天低斷



澗流泉澀平岡古木齊何當一作時謝塵鞅此地卜幽棲

王 與一首

與字廷貴武進人景泰辛未賜進士第三授翰林編修遷侍講歷春坊右庶子改南京翰林學士陞國子監祭酒擢南吏部右侍郎召為戶部左侍郎陞南吏部尚書卒贈太子太保謚文肅有思軒豪

李時遠云宗伯為詩清雅間出悲壯之音

宿沛縣泗亭驛

維舟當泗水涼雨洗炎蒸砧杵孤城月漁舟別浦燈客  
愁秋更甚鄉夢遠難憑千古龍飛地令人感廢興

楊守陳 三首

守陳字維新鄆縣人景泰辛未進士改庶吉士  
除翰林編修歷侍講洗馬遷學士擢吏部右侍  
郎兼詹事府丞卒贈禮部尚書謚文毅有晉菴

桂坊鏡川東觀金坡銓部諸集

李賓之云文毅詩博采深詣典

則溫厚成一家言而愛君憂國  
感事寓物得諸三百篇者深

# 游虎丘

詩話文藝難經伉伉不屑拾淳熙諸儒遺唾而  
詩格深穩在唐宋之間其史館感懷詩云在古  
左右史言動悉分書由漢至國初有官注起居  
不知自何歲史職曠成虛有故始闢館編纂亦  
紛如新人叙陳迹寧免閤且疎又云崔杼弑其  
主直筆遭刑誅二弟相繼死南史猶特書古人  
守一職往往思捐軀可憐今世士利害論錮銖  
蓋公留心史學當草疏言國史有三大闕事未  
舉一靖難後不記建文君朝政及方黃死事諸  
臣一景帝已復位號實錄猶附書稱郕戾王一  
章疏留中者不獲登實錄宜宣付史館惜乎疏  
雖草而未及上也晚語徐少詹云平昔才無半  
斗而勤作文飲僅數合而喜與客讌行  
不能里許而好游蓋雅人之習尚然矣

出城纔數里已到白雲間但見門臨水那知寺有山鐘  
鳴僧出定林動鶴飛還石磴行行遍花宮盡啟關

贈周廷參張邵齡二知己

客牕情思渺無涯麥隴蔬畦浥露華白屋三間連野寺  
青苔一徑入鄰家晴烟亂繞庭中樹夜雨微沾戶外花  
此地幽偏可乘興馬蹄來去豈嫌賒

春城遊宴詩

蝓蚌石首和椒橙新筍香甘帶肉烹非是老饕偏愛此

十年不歎故鄉羹

童軒一首

軒字士昂鄱陽人以天官學入欽天監家於南  
京中景泰辛未進士以吏科給事中撫川寇謫  
知壽昌縣久之以太常少卿掌欽天監以右副

都御史總制松潘歷陞吏部尚書致仕有清風

亭橐枕肱集

周吉父云尚書九日詩云黃菊酒  
香人病後白蘋風冷鴈來初草堂

詩云草堂夜雨生科斗花  
逕春風叫栗留均佳句也

憶金陵

金陵佳麗地風景想依然城闕金湯固江山罨畫連晚  
風樓上笛春水渡頭船惆悵曾游地而今又幾年

王越九首

越字世昌濬縣人景泰辛未進士天順中以御  
史超拜右副都御史巡撫大同進太子太保兵  
部尚書論出塞功封威寧伯佩征西前將軍印  
尋加少保兼太子太傅卒贈太傅謚襄敏有雲

山老嬾集

李賓之云王公歌詩雄邁跌宕若不  
屑意而奇偉不羣 崔子鍾云王公

詩明易通暢不事艱刻然氣象雄偉才思煥發

王鳳竹云王公摘辭拔藻品格直逼盛唐其

忠君愛國之心懇惻流溢良由賦才之奇渾然  
天成不假匠鑿 李時遠云威寧才思之美倚

馬萬言往往皆出新意使加以深沉之思豈一

時操觚者所能及 李舒章云威寧才思敏捷

奈其太率不脫兜牟之氣 周青士云威寧詩

不雕不琢而符采奕然五言如一杯今夕酒十

載異鄉人客裏有歸夢眼前無故人石橋平似

掌茅屋小於船豆萁穿籬過苔錢上樹生飛來

沙上驚銜出水中魚夜吟山月小春夢海天遙

七言如四面好山朝日觀一溪流水落天門雲

間難犬迎遊客雨後兒童掃落花一路草香都

是藥滿林樹老盡生苔聞身未老休扶杖短髮

無多不受管風向眼中吹出淚霜於鬢上凍成  
冰愁人正似井中坐好客忽從天上來金縷且  
聽新樂府鐵衣休話舊軍功亭前春雨一林竹  
溪上秋風兩岸蘆路隔三千餘里遠月經二十  
四迴圓百年人得幾時健一歲月無今夜明自  
笑年來長送客不知身是未歸人鵲遺巢去鳩  
先入蛛曳絲來蝶倒懸山下夕陽芳草路橋邊  
流水落花村當時只學魯男子今日不如阿大  
夫莫笑買牛新學稼也曾騎馬  
舊巡邊不求工而未嘗不工也

詩話盛寧功紀旂常盟申帶礪立功已足不朽  
而於詩沾沾自喜長篇奔放如快馬不受羈絆  
未免有銜蹶之虞雖意在取法盛唐然往往流  
入擊壤一派其送周宗太詩云可憐相見未能  
久無那匆匆又分手臨岐把袂且談詩何用尋  
常一杯酒古詩起於列國前孔子刪為三百篇



發乎性情止禮義所以音律皆自然後來風雅  
不復作獨有離騷味堪嚼秦漢已下雖頗淳已  
食古人之糟粕咸唐取諸杜少陵西晉取諸陶  
淵明少陵忠義所感激淵明渾然而天成五代  
之詩無足齒宋人之詩理而已抑揚辭氣欠從  
容遂失溫柔敦厚旨元人之詩學晚唐巧者自  
巧狂者狂大音元氣日凋喪詩道至此幾云亡  
又近體論詩云雕肝斲肺漫勞神語不求奇意  
自新爾雅本無難識字離騷選  
有獨醒人蓋自道其所得也

### 中秋對月用孟浩然韻

明月下空庭清光寒不濕寒簾坐來久忽見飛螢入空  
懷寂無聊何處砧聲急對酒不成唸起向西風立

榆陵送武靖侯趙公還京

古人一日別常懷千里思況在天之涯而與君相離風  
寒歲云暮夜永雞鳴遲悠悠行路難苦樂心自知人生  
如浮雲聚散安可期君歸日以遠我歸當何時豈不念  
鄉國顧此王事縻霜月滿孤城照見遊子悲

遊金龍池

雲深池水寒流出青山口雲水復何心鷗鷺自相友時  
維秋氣涼佳節近重九侵曉解征鞍徘徊日將酉陞覽

古遺蹤因之問村叟叟云吾不知世遠人亡久文獻不足徵請看池上柳遙遙數百年今亦半枯朽人生能幾何少壯忽老醜往事無足論且盡杯中酒

見彗

野雉雉於鼎桑穀生於朝聖王務修德災患乃自消彗星見東方垂象何昭昭天心愛人君君心胡可驕反身當自責弭此天上妖轉禍以為祥一念之所招

金雀花

侯門愛金雀金雀顏色好化作枝上花凌春獨開早冶  
遊亭館多芳容等閒老東風一飄零不及澗邊草

初度

今年四十八去年四十七明年四十九五十爭幾日逆  
數六十來光陰彈指疾七十從古稀八十安可必所以  
百歲人千萬不見一嗟哉宦海中悠悠良自恤

題蠲上人畫

好山萬仞高插空羣峰竝列青芙蓉大者突兀如盤龍

小者箕踞如蹲熊峰頭短樹亂如草凌霄獨立蒼蒼松  
一重流水一重竹竹邊盡是山僧屋上方下界知幾重  
銀杏紅椒滿空谷山中屋貯山中雲山中雲卧山中人  
山中之人出山去畫裏看山秋復春

蜀中送項斯誠同年回京

白髮慈親七十餘不知消息近何如老來賴我供湯藥  
別後憑誰奉板輿旅館夜長頻有夢故鄉路遠久無書  
君歸正向門前過為報平安莫倚閭

鴈塔

慈恩古塔一閒登瘞鶴銘亡問寺僧舊壁遍題唐進士  
遠烟多見漢原陵感懷已寄無窮事縱目還須最上層  
不省風鈴緣底語只今誰是佛圖澄

馬文升一首

文升字負圖鈞州人景泰辛未進士累官少師  
兼太子太師吏部尚書贈太傅再贈左柱國太  
師謚端肅有集

游桃源洞

桃花源接武陵溪  
咫尺仙家路易迷  
指點秦人舊蹤跡  
蕭蕭方竹斷橋西

姚旭一首

旭字景暘桐城人景泰辛未進士授刑科給事中  
天順間以言事謫判鄭州仕至雲南參政有

菊潭集

管叔城

管城廢址草茫茫屈指曾經百戰場但有鷓鴣鳴夜雨  
不堪車馬送斜陽山含秋色迷孤館樹引荒雲覆女牆  
試上層樓頻悵望鎬京離黍總堪傷

沈 珪 一首

珪字公貴平湖人景泰辛未進士山東道御史  
有橋門漫橐柏臺新橐

詩話公貴少與兄公禮齊名公禮名琮中正統  
壬戌進士仕至廣州守兄弟居父母喪廬墓下  
六年不肉食先後哀毀卒詔旌其宅曰孝行之  
門公禮詩有石窗漫橐予少日曾見之記有櫺



經香生秋雨後桔槔聲斷夕陽前雨餘竹外僧  
歸寺日出松顛雀下巢山花帶雨落成片野鳥  
見人飛作羣之句今其集不復  
再觀矣錄公貴詩附識於此

### 題漁隱故居

名落人間二十年一溪漁隱自悠然晚風楊柳堤邊笛  
秋雨蘆花渡口船沽酒肯邀漁父醉枕蓑時伴野鷗眠  
只今回首成陳迹贏得人稱似輞川

李應禎 一首

應禎名姓以字行更字貞伯長洲人景泰癸酉

舉人授中書舍人仕至南京太僕寺少卿有李

氏遺集

李時遠云少卿詩朗秀  
沖閒已造中唐佳境

詩話少卿入太學中官牛玉請為塾師固拒之  
在中書日應制寫佛經進曰臣聞為天下國家  
有九經不聞有佛經也不受命可謂婢直矣歸  
田後與吳原博史明古張子靜輩賦詩聯句其  
寄友詩云別墅園基常戴酒晴  
湖泛月不張帆風流可想也

東禪寺

松杉滿院風豆莢一籬綠不聞車馬喧時有高人宿

徐溥一首

溥字時用宜興人景泰甲戌賜進士第二累官

少師兼太子太師吏部尚書華蓋殿大學士卒

贈太師謚文靖有謙齋文錄

朱懋忠云文靖詩清潤和平足以鳴

國家之盛

詩話文靖詩不求工然如鳥跡平沙晚花香小徑春但使客長醉何妨酒屢賒綽有風致

### 歸樂堂

十年游上國此日賦歸歟倦却風塵路來尋水竹居山  
行春載酒門掩畫攤書薄暮投林鳥相看意自如

何喬新四首

喬新字廷秀一云字天苗江西廣昌人家宰文  
淵子景泰甲戌進士授南禮部主事改刑部歷  
員外郎中陞福建按察副使改河南擢都察院  
右僉都御史巡撫山西召為刑部左侍郎進尚  
書卒贈太子少傅謚文肅有椒丘集

秋懷

白露悴百草元蟬寂無聲庭柯斂新翠日夕寒蟬鳴感

此時序易披衣坐前榮仰視天宇間銀河隔雙星一葦  
亮可航相望未合并玄運亦多阻矧茲塵俗情援琴鼓  
別鶴感我淚交零

登岳陽樓

雲牕月牖俯清流蒲目山川快壯遊誰向江湖懷北闕  
謾誇樓閣冠南州朱絃夜鼓湘靈瑟錦纜春迴楚客舟  
欲起靈均歌九辨澧蘭沅芷徧芳洲

擬唐宮詞

花貌宮娃老掖庭承恩元不在傾城披香殿上開春讌  
閒看羣姬弄化生

過故相第

門掩西風畫不開  
蚬蟻滿壁粉牆頽  
庭前乳犬休驚吠  
無復懷金暮夜來

謝省一首

省字世修黃巖人景泰甲戌進士南京兵部員  
外郎出知寶慶府

山行

杖屨躋攀到九華不知處是仙家  
高蹤一去無消息惟有碧桃春自花

李裕一首

裕字資德豐城人景泰甲戌進士授監察御史  
陞山東按察使轉陝西左布政召入為順天府  
尹尋陞右都御史未幾調南京轉工部尚書改  
吏部有餘力橐東藩倡和詩

渡揚子江

曉經揚子渡畫舸一帆輕潮湧金山寺雲連鐵甕城江  
脉吹浪白海日照林明坐聽鐘聲發悠然物外情

張寧十一首

寧字靜之海鹽人景泰甲戌進士官禮科給事中  
兩使朝鮮轉都給事中出知汀州府有方洲

集

徐子元云方洲高雅清俊得唐調王元美云張靖之如小權急流一瞬而過無復雅觀

蔣仲舒云靖之既離瑣闥旋就乞身追念舊恩愴然興涕歌詩本於才敏終鮮沉思大槩一時



之雄終難百世之業  
情頗稱作者句如林葉經霜盡河冰近午開殷璠所稱意新理  
恆斯得之矣

詩話黃門賦才捷敏不費沉思兩使朝鮮水館  
星郵留題殆遍陪臣朴元亨以刑曹判司為館  
伴詩篇酬和殊不相下及偕登太平館樓黃門  
成七言長律六十韻元亨誦至溪流殘白春前  
雪柳折新黃夜半風之句乃閣筆曰不能屬和  
矣使旋為大臣所忌出守汀州與岳文肅同日  
拜命致仕歸而築方洲草堂於海濱疊石為山  
上有峰曰蒼玉曰拄頰曰小飛來巖曰宿雨曰  
滴露洞曰歸雲坡曰蘭雪岫曰茶烟嶠曰咏月  
磬曰卓筆泉曰洗研池曰映山皆刻於石而通  
目之曰一笑山家居三十年歌詩畫筆與雲東  
逸史齊稱暮年無子有二婢子曰寒香晚翠剪

髮自誓不下樓者四十年有司以聞詔旌為雙  
節釋明秀詩云交剪雲鬟報主恩鏡臺花落洗  
頭盆同心誓死方洲上霜月寥寥夜照門一時  
和者甚衆黃門嘗過杭州潑墨寫目送飛鴻手  
揮五絃圖縱橫潦草侍婢笑之題詩云問尋敗  
筆作圖畫小鬟立侍笑欲倒山頭顏似土灰堆  
樹根亂若蓬蒿草所云  
小鬟殆即寒香晚翠乎

重遊金粟寺有作

溪迴通小艇山峻露層臺林葉經霜盡河水近午開閒  
雲僧出定舊雨客重來擾擾浮生路經過定幾回

感事

羽書昨夜報居庸百萬雄師下九重天子垂衣臨大漠  
羣臣端笏扈元戎禁中已乏回天諫閭外誰成闢地功  
千古澶淵扶日轂令人長憶寇萊公

莫愁樂

金雀玉搔頭生來字莫愁自從歡去後不出石城游  
南浦停雲

不見同心人相思渺雲樹記得別離時却在飛雲處  
林良花鳥

竹樹晚淒淒天寒相傍棲春風疎雨歇飛上畫樓啼

園梅盛開

暖透孤根雪乍消冰花萬點綴寒條尋幽欲寄山中客  
忘却西湖有斷橋

後浦漁歌

欸乃新聲度遠汀烟消日出樹冥冥年來悟得滄浪意  
長近西堂竹下聽

題畫

杳靄昏黃夜泊船  
鷓鴣聲裏雨如烟  
秋風不見平安信  
夢斷湘江又十年

竹鶴老人畫

水烟山靄樹冥冥  
船在丹青畫裏行  
好是苔溪二三月  
南邊雨落北邊晴

蘋花館

宿水停烟綠近牆  
繞門葭菼共蒼蒼  
寒香欲薦無人采  
月落空庭夜有霜

寄余驛丞

南薰亭館晚相延，屈指星霜又十年。  
不是重來渾忘却，黃昏舟過驛門前。

彭華一首

華字彥實，安福人。景泰甲戌進士，改庶吉士，累  
官禮部尚書，入直內閣，以宮保尚書致仕卒。謚  
文思，有集。

明妃曲

抱得琵琶不忍彈  
風沙獵獵雪漫漫  
曉來馬上寒如許  
信是將軍出塞難

丘 濬 五首

濬字仲深瓊山人景泰甲戌進士選庶吉士授翰林編修歷侍講學士陞禮部侍郎進尚書加太子太保入直文淵閣尋加少保戶部尚書武

英殿大學士卒贈太傅謚文莊有瓊臺會豪

李賓

之云公之學於詩固有所不屑專而實專門者所不逮程克勤云公詩如仙翁劍客隨口所

出皆足驚人雖雅俗正變體裁不一而格律精  
嚴不失矩度黃才伯云先生信口為詩語皆

警拔

詩話文莊於詩不事鍛鍊而矩度自合其與友  
人論詩絕句云吐語操持不用奇風行水上蒲  
抽絲眼前景物口頭語便是詩家絕妙辭其言  
未嘗不是第恐學者因之流於率易墮入定山  
一派不可也

擬古

依依重依依不忍生別離別離已可悲况值秋風時柳  
衰不堪折情苦不堪說願妾為小星君身化明月明月



貼天飛小星恒相隨月出星隨出月歸星亦歸莫學秋  
胡妻相逢不相識生者固可慚死者亦何益

送廣東夏廉憲

當宁念遠氓塗炭日以極詔簡在廷臣往司風紀職僉  
曰御史某秉德剛且直屬耳按左右風聲甚煇赫兵政  
既以舉吏弊亦以革謠言聞遠近公論推第一無如斯  
人可拜手荅明勅天子曰俞哉超授三品秩天語重丁  
寧綸命光舄奕百僚無間言相見咸喏喏而我嶺南人

慶幸倍千百預為鄉人喜從此得蘇息特恩許乘傳陞  
辭行有日走也官禁近早有半面識中心久有懷臨分  
忍緘默聊為陳本末幸與垂采擇惟茲東廣地富麗自  
古昔秦初已內附漢後亦廣斥東西數千里十郡六十  
邑衛所錯其間小大五十七憶昔全盛時承平久寧謐  
家家有蓋藏人人各安適土著少流徙世業足資給士  
族尚詩禮農家務耕織先期輸賦稅俛首供力役民不  
受箠楚兵不識鋒鎬行旅不齎糧遠出不待吉昏夜絕

剽竊歎歲無行乞況復天氣暄地利多所獲三冬著苧  
衣五月收新植山畬少汙萊水田自潮汐舟游泛滄茫  
火種燒劣窮曉包趁墟飯晴著登山屐海錯富蚌蜆家  
烹剥豚駟文本生山林珍貨來蕃舶荔奴然火樹橘柚  
垂金實閭右食素封田圃盛嘉植愛身寧破產終訟羞  
曲筆遐邇總安恬公私舉豐殖逮及廿年來長吏恣胸  
臆厚利動其中甘言誘其側欺彼民柔愚藐茲地遐僻  
遂決禮義防大肆搏噬力把臂褫其衣挾口奪之食溪

壑填不滿氣燄撲難熄上下相師承前後遞沿襲豈云  
無鷹鷂方自為螽蟴天門遠萬里無地訴冤抑致令仁  
厚性化作兇險質弄兵潢池中延息苟旦夕外邪尋即  
除中虛遂成疾蠢茲洞中猺窺伺乘間隙始惟掠近地  
稍稍出復匿迹彼素脆懦頌異戎與貊制伏本非艱而  
我狃安逸武胄恥言兵文吏諱申賊縱虎出林薄延鬼  
入居宅路有橫草虞闕無一夫搤長驅捲村落乘夜盜  
城壁豈彼智有餘乃我法不立歲歲轉徬披邊境遭輶

輾脅從日漸多元徒日增益居民就流散人烟渺蕭瑟  
已身不自卹何暇問家室田蕪乏犢耕井渫無人汲萬  
家春草青一望秋原赤禾麻種殆絕雞犬聲亦寂昏雨  
燐火青涼月死骨白內地幸苟免因之困供億相扇咸  
弗靖濡沫聊戢戢方今堯舜朝大臣總皋稷萬國俱時  
雍一方獨艱阨九重赫然怒遣將擣其窟天道信好還  
王師本無敵鼎魚姑假喘穴蟻難藏迹行當見埽平腥  
穢永蕩滌却愁火然岡罔辨玉與石嗟爾嶺徼人罹此

殊可惜賈父來每晚謝令去不亟由來非一朝往者何  
嗟及幸茲天日開光景方昭熠草木回生意山川增秀  
色福星離紫垣甘雨隨丹軾指日下滇江持節鎮南國  
先聲一以聞父老懼以泣迎拜古道旁應以手加額願  
言明使君代天布仁德為我招殘魂為我肉枯骼為我  
作保障為我剪荆棘為我開喉吻為我插羽翼醫我眼  
前瘡除我腹中匿我寒衣以裘我飢食以粒生者受我  
廛死者與我裨一夫或失所孰非使君責使君今已行

行行去須急齊民正倒懸異類尚反仄如病望醫師如  
旱望雨澤寄聲報吾人此公古難得瘴海行將清貪泉  
不能惑佇看凋弊區復作全盛域

鍾廣漢云長  
篇銳氣不衰

### 村行

萬里勞行役驅車趁晚晴鴉邊殘照遠雨外斷虹明山  
徑高低路村春遠近聲隔林人語寂一犬吠相迎

### 中秋有感

客裏逢秋景思鄉倍愴神依然今夜月不見去年人

秋思

水落淺灘石出霜冷疎林葉丹天外數聲過鴈人在高樓倚闌

伍方一首

方字公矩嘉興人景泰甲戌進士知武岡州謫戍柳州有柳菴集

詩話公矩與張靖之丘仲深同年成進士三人莫逆時有倡酬靜之詩云丘仲深伍公矩元是長安看花侶又云江東雲渭北樹仲深不來公矩去望斷斜陽舊游處仲深亦有送公矩之柳



州詩云平生故人伍公矩少年學文今學武興  
來拔劍為我舞顧儂豈是噲等伍末云吳山高  
兮粵水長南歸若見張給事引杯燒燭歌我送  
行章可謂篤同譜之義矣柳菴集予少日於金  
明僧舍見之凡四冊曾覽一過今購之不復可  
得僅從櫺李英華集錄其一絕雖不見好存其  
人也

### 畫竹

花點湘雲墮碧川  
翠梢零落帶秋煙  
歸篷記得曾看處  
殘月黃陵古廟前

### 杜庠一首

庠字公序長洲人景泰甲戌進士除知攸縣罷  
歸有楚游橐江浙歌風集

詩話公序從張節之游同學者藐之節之贈詩  
云炳蔚虎豹文卓犖珊瑚枝學子因改視焉嘗  
過赤壁題詩張汝弼奇之一時呼為杜赤壁仕  
既不達汗漫湖海間自稱西湖醉老莓牆椒壁  
過輒留題然不經  
意其可存者寡也

寄吳中諸友

故園東望路綿綿一別何期竟隔年  
客思半消春酒後鄉心都在夜燈前  
杏花村店西山雨楊柳河橋上苑煙

欲語平安歸未得自嗟身為薄名牽

彭

澤一首

澤攸縣人景泰丙子舉人

春日雜興

春陰庭館晝生寒落葉游絲濕作團年少風流今減盡  
牡丹開遍不凭欄

桑

瑾一首

瑾字廷贊常熟人景泰丙子舉人處州府通判

橫瀝口泊舟

浦外炊烟起柁牙岸頭茅屋是農家  
一冬苦雨全無麥二月春晴未見花  
野渡至今濡馬足江潮久不露鷗沙  
間隨漁父談占候怕見朝霞愛暮霞

黃瑜二首

瑜字廷美香山景泰丙子舉人長樂知縣有  
雙槐詩集

井嶼

宋端宗御  
舟至此

白雁過江南破更無一尺土可坐自閩入廣隨波流塵  
沙暗天天亦愁黃蘆苦竹風颼颼鷓鴣雨中啼不休上  
有深井山下有仙女嶼黑雲卷波白浩浩漁舟不到御  
舟到鱷魚髻揚蛟尾掉蒼天蒼天誰與告

詩話是詩依南海歐秦孚所藏  
錄本與廣東通志所載不同

### 城西劉王故院

江水東流西日斜劉郎綦跡尚天涯昌華苑外裙腰草  
玉液池邊鼓吹蛙隔隴牛羊聞牧笛遙林烟火見漁家

當年翠輦宸遊地留與東風長稻花

陳贄二首

贄字惟成餘姚人以薦官儒學訓導入為翰林

待詔陞廣東參議遷太常少卿有蒙菴集

黃太沖云

惟成從鄉先生宋公傳張臺民得其詩法  
評者謂古詩逼陶柳近體駸駸乎盛唐

晚發五溪

巴川移短櫂正值暮秋天客路猿聲裏鄉山雁影邊  
蒹葭連晚渚穠稌滿秋田風物雖堪戀其如歸思牽

蠻中

蠻溪雨過葉皆流  
落日猩猩啼樹頭  
高竹亂藤茅屋小  
不知村落屬何州

劉英二首

英字邦彥錢塘人景泰中郡邑交辟以母老辭

有賓山集蕉雪橐竹東小橐湖山詠錄

程克勤云邦彥

孝友似黃山谷高蹈似魏清逸曠達似楊鐵崖其詩精妥流毫兼備衆體

寶峰樓看沈啟南畫因懷畫中詩人存沒

尋僧重上寶峰樓撫景興懷不自由東海傷心諸老散  
西湖回首十年游摩挲舊畫題新句慙愧青山對白頭  
空負梨花一尊酒無人共載木蘭舟

載酒過湖

寒食清明次第來紫苞紅萼裏池臺東風似與人商略  
最好花枝最後開

聶大年 五首

大年字壽卿臨川人用薦為仁和訓導陞教諭



景泰初徵入翰林卒有冷齋集

俞汝成云壽卿詩尚襲元調

詩話聶大年掌教武林揭對聯示諸生云文章  
高似翰林院法度嚴於按察司以是見忤達官  
九年不調泰和王行儉掌銓衡以詩寄戴文進  
索畫自叙十年始成大年題其後云公愛文進  
之畫十年而不忘也使公以十年不忘之心待  
天下之賢天下豈復有遺才哉語稍聞於王而  
王不介意也天順初被徵入史局病中以詩別  
行儉曰鏡中白髮難饒我湖上青山欲待誰千  
里故人分橐少百年公論蓋棺遲行儉得詩泣  
下曰大年欲吾銘其墓耳明日而大年卒行儉  
為作墓志曰吾以大年之才必能自振故久不  
擬薦而乃止一校官邪大年諸體平熟惟絕句  
小詩差有韻致比於劉泰士亨陸昂元  
偁馬洪浩瀾王澄天碧諸子似勝之

題畫瓜

翠實離離引蔓秋  
西風涼露滿林丘  
東門尚有間田地  
千載無人說故侯

題彥顥畫中小景

水禽沙鳥自相呼  
遠近雲山半有無  
一葉扁舟兩三客  
載將烟雨過西湖

題許上舍家梅花

西湖曾繫木蘭橈  
湖上殘雲雪未消  
報道南枝春信早

移船更近段家橋

夏日次侃禪師韻

高亭暑夜景相和涼月絺衣挂薜蘿楊柳風輕湖面闊  
不知何處藕花多

題仲昭竹

舍人老作鄖陽守尚愛揮毫寫竹枝絕似樣舟湘水上  
鷓鴣啼斷雨來時

陳延齡二首

延齡初名壽字昌年嘉興人景泰中郡掾史有

玉崖子集

題畫二首

洞庭微雨曉生波一櫂雲山客裏過  
綠遍蘼蕪歸未得東風閑唱竹枝歌

楊花如雪正殘春新水茫茫浸綠蘋  
桃葉桃根何處是東風愁殺渡江人

劉溥七首

溥字原博長洲人宣德初授惠民局副使後調

太醫院吏目有草牕集

王元美云景泰中稱詩豪者十才子而劉溥湯

肅勛為之首 蔣仲舒云溥詩如淮陰少年武健自足時欲侮人使少加揖遜亦一時名流

詩話劉原博湯公讓盛有詩名原博於除夕為劉主事廷美作終南進士行廷美懸之堂上次

日賀正客至爭裂門籍紙傳寫廷美笑曰此乃耗紙鬼也嘗語客云不讀二萬卷詩看溥詩不

得而公讓守宮詩出一時驚歎以為有神今觀之殊堪作惡時無英雄遂有十才子之目然就

諸子而論原博特多忠排之言於彼法中差勝劉宗器贈詩云心事一於詩激發何慨慷靜中

聊自怡鬱抑賴舒暢短草既從容長篇亦跌宕府藏出珍奇鈞天秦壑正如巨陂中魚龍交

蕩漾有時為我歌三嘆而  
一唱未免矜譽過其實矣

古意

美女出齊州容華世無雙  
修眉結輕綠麗目曼騰光  
鮮紉被玉體明月綴兩璫  
巧笑發春華氣若秋蘭芳  
窈窕高樓居宛在大道傍  
媒氏致千金琴瑟諧高張  
既製合歡被復製合歡牀  
德義苟無虧恩愛永不忘

雜詩

仲秋涼氣肅白露下庭  
柯芳蘭委輕飈桂樹行  
復華俛

仰時節至生意迭以嘉理運本自然無為徒咨嗟人生  
貴有道富貴安足誇膏火一朝盡撫膺其奈何

晚過揚州

長安懸落照短櫂尚孤征衰柳愁邊斷殘霞雨外明人  
喧揚子渡鐘動廣陵城漸去鄉關遠淒然倍旅情

使回過獨石

邊城二月暗塵沙吹遍東風不見花天遠玉京旋日騎  
水通銀漢繫星槎雲中路出高山險上谷雲連獨石斜

正是旅愁消未得夕陽樓外又鳴笳

江上別

相逢蘭渚潮長相送烟江日斜只說儂家易識門前一  
樹梨花

題畫寄徐州陸九皋

二首

別後重來未有期且憑圖畫寄相思秋風黃葉茅亭上  
猶記逢君是此時

目極天涯酒半醒楓林斜帶遠山青故人家在秋雲外



百步洪邊水繞亭

湯脩勣 二首

脩勣字公讓東甌襄武王曾孫授錦衣百戶轉

千戶景泰中命通問上皇歸進指揮僉事成化

初以叅將守延綏戰沒有東谷集王元美云湯公讓劉原博

如淮陰少年斗健作歌人狀

詩話徐元玉言於裕陵曰湯脩勣酒風漢耳鄒克明嘲以詩云湯家公子善夸調好似虬蟬撼大樹文章光燄萬古長却說杜陵無好句當時公論蓋未盡輸心也程克勤為作傳稱其詩豪

邁奇崛名家退避豈其然乎然使不  
辱命死於疆場則誠豪傑之士矣

遊仙

月照參差海上峰  
飈輪度處滅行蹤  
玄冥宮裏通宵宴  
傳得新方解  
泰一作龍

巨俠

獵火茫茫照四山  
青衣小隊射生還  
貂裘幾點輕盈雪  
月照城門未上鐶

蘇平

四首

平字秉衡海寧人舉賢良方正不就有雪溪漁

唱

陳廷器云二蘇皆趣高遠聲律和暢昭乎治世之音 李時遠云平詩溫柔敦厚自是可

人

詩話鄭谷鷓鴣崔珣爲謝逸蝴蝶袁凱白燕  
皆以一詩目之終身至蘇東衡以繡襦得名風  
斯下矣即其南陌踏青春有跡西廂立月夜無  
聲二語乃本於瞿宗吉少時香奩之作所云燕  
尾點波微有韻鴈頭踏月悄無聲也以吞剝而  
得虛譽忸怩已甚而秉衡妄爲大言謂宋一代  
今體詩僅王禹玉元夕一律彷彿唐人高青丘  
詩二千首近體止吳女誦經一首可取爾當日  
鄒御史克明作三夸詩以秉衡爲首其次湯公  
讓其次劉原博克明名在十子之列在同調亦

不免嘲笑之  
他可知已

雜詩

彼美南國姝婉孌貞且良丹霞製為珮明月懸為璫白  
玉蓄光采幽蘭含芬芳見者咸歎息不殊古姬姜世無  
蹇修氏玉帛誰為將默默處重閨何曾下中堂容顏豈  
不好攬鏡徒悲傷但恐芙蓉花零落隨秋霜

寄金粟王公子

中夜百憂集攬衣起傍徨明月揚素輝列宿互低昂耿

耿河漢流肅肅鴻雁翔念我同心人渺渺天一方昔為  
雙游魚今為孤飛凰援琴不成曲展轉憂思長豈無蕙  
蘭花為君掇其芳道遠莫致之中懷徒自傷

塞上曲

戰馬聞笳鼓橫行出塞門隴雲凝陣黑殺氣入邊昏決  
策平沙漠捐生報國恩猶慙漢公主萬里嫁烏孫

班婕妤好

一自辭同輦深宮草又生甘隨紈扇棄猶記玉階行明

月愁中影流鶯夢裏聲笙歌前殿夜教妾若為情

蘇正一首

正字秉貞平弟有雲壑集

江南旅情

天涯為客久生計日蕭條旅思

一作况

頻看月鄉心獨聽

潮春歸江上早家在夢中遙無限相思意東風白下橋

蘇直一首

直字秉忠平弟有蘭畹集

詩話秉衡兄弟三  
荆同株無分高下

### 送人東歸

東風官路柳依依  
目送鄉園賦式微  
晚渡雨晴孤櫂發  
春江潮落遠人歸  
夢回野戍遙聞角  
家近滄洲獨掩扉  
惆悵天涯同是客  
臨岐那忍又相違

### 蔣主孝一首

主孝字務本儀真人徙句容有樵林摘橐

### 無題

鳳輦春游繡嶺宮  
閑庭小雨落殘紅  
貞元朝士知誰在  
一曲琵琶月正中

蔣主忠一首

主忠字存恕  
主孝弟有集

芙蓉

清露下林塘  
波光淨如洗  
中有弄珠人  
盈盈隔秋水

沈愚十一首

愚字通理  
崑山人自號崆峒生  
有篋籟吳歎二



# 集

詩話景泰十子才多下中通理特為翹楚同輩  
極其引重劉原博題其集云清如玉樹含秋霜  
麗如五色雲錦張琅然天外度靈響一曲一奏  
春風香蘇東衡贈詩云玉山才子東吳英丰姿  
皎皎冰壺清曾中磊塊含元精騷壇少年推獨  
步天仙鬼仙何足數又云多君祇今英妙年已  
有新詩滿人口俊逸還凌鮑謝前清新肯落盧  
王後王善甫贈詩云玉山沈郎更滿灑芙蓉秋  
水涵冰姿摩挲石壁寫新句毫端墨汁光淋漓  
虔州黃進士閨詩云多情才子惜春華樂府新  
聲對客誇朱雀橋邊舊游路東風開遍小桃花  
誦之可想見其人矣余初見吳歙集錄其三詩  
近東田學士示以先世手抄篋集私印尚存  
增益八首詩諸體皆清穩而絕句尤矯矯軼羣

在劉白之間題畫二首云汀蒲短短柳參參三月桃花水滿潭攜酒抱琴同一醉人生只合住江南山邊臺榭水邊樓秋月春花足勝游平底畫船如屋裏人生只合住蘇州通理兄弟四人愚魯質訥魯字誠學以學官弟子入場屋望見諸生蓬頭赤腳歎曰待士如此士可知矣遂走出不復與試以文筆自娛嘗作劉過傳西楊見而擊節曰如此人當以翰苑處之或勸其入都往謁不屑也訥字文敏中正統壬戌進士仕至福建按察副使卒于官仲季皆能詩所著集不傳學士誠學之雲孫也與予同年入翰林述其家世本末如是

閭門柳枝詞二首

小蠻能唱白家詞笑把纖腰鬪柳枝愁絕樽前春未老

風流太守髻成絲

枝枝搖翠綰香車占斷春風日未斜  
記得皋橋舊游處綠烟深鎖泰孃家

舊游即事

冶城東畔舊亭臺寂寂朱扉映竹開  
一樹碧桃都落盡去年蝴蝶却飛來

寄淮南

江南相望路迢迢風滿關河雁影飄  
最好鳳皇臺上月

共誰攜酒聽吹簫

過桃葉渡

江花含笑欲爭春  
江水籠烟柳色新  
商女停舟唱桃葉  
東風愁殺渡江人

石頭城

谷口青鞵踏軟沙  
橋頭艇子載琵琶  
春風何處尋芳好  
盧女門前幾樹花

金陵九日

京華風物近佳辰  
黃菊秋香漉酒巾  
欲上鳳臺同一醉  
客邊誰是故鄉人

閭門夜泊

絲絲楊柳拂官河  
烟際樓臺隔岸多  
此夜闔閭城下泊  
滿船明月聽吳歌

旅次送晏振之

西風孤櫂楚江濱  
烟水殘陽照白蘋  
底事送君情轉切  
只緣身是未歸人

旅次石城

水落寒江露淺沙  
斷隄烟柳集昏鴉  
樽前冷笑陶彭澤  
三徑秋香負菊花

陳宮懷古

景陽宮井積浮埃  
三閣遺基半綠苔  
惆悵後庭花落盡  
黑頭江令獨歸來

鄒亮一首

亮字克明長洲人用薦授吏部司務遷南京監

察御史有鳴珂漱芳二集

詩話克明受知於周文襄用況守伯律薦授官  
嘗撰詩宗韻海未就而卒自稱梅崖亦曰藻菴  
居士病中自撰志銘謂脩短有數遺墓在長洲  
縣金鵝鄉志中不及劉湯諸子姓名非其所矜  
也式

長信宮

妙舞方承寵愁懷獨感傷  
金輿門外度紈扇篋中藏  
別殿生秋月空階落晚霜  
涼颭如有意渾不到昭陽

王淮二首

淮字柏原慈溪人有大塊橐

詩話柏原淹博號  
行祕書詩殊淺率

寄吳廷圭

雁叫新霜九月時客邊節物倍淒其風吹敗葉藤纏屋  
雨濕疎花豆壓籬八跪蟹肥村店酒一行鷺促野橋詩  
待君流水柴門下共醉殘陽倒接羅

秋夜書懷

破窗燈火黯淒淒一榻空齋抱影棲愁斷關河千里雁



夢回風雨五更雞田荒故國蒼苔遍路接長亭碧草迷  
歎息此身緣底事十年蹤跡苦東西

王貞慶一首

貞慶字維善一字善甫定遠人駙馬都尉永春  
侯寧之子有茗芋集

詩話善甫懷慶公主所出生於侯門而能脫去  
紉綺之習築別業於聚寶山中闢一軒繞以桂  
樹因自號金粟主人能書善飲酒名  
其詩曰茗芋集羊城陳廷器序之

送沈崆峒歸玉峰

客從東吳來暫向金華住看遍京華春更憶東吳去秦  
淮橋頭烟柳青執手臨歧別恨生扁舟後夜知何處月  
色江聲無限情



明詩綜卷二十五

總校官庶吉士臣張能照

校對官檢討臣龔大萬

謄錄監生臣樊少臣

欽定四庫全書薈要

集部

明詩綜卷二十六

七

詳校官編修臣王天祿




欽定四庫全書薈要卷二萬四百九十九

集部

明詩綜卷二十六

翰林院檢討朱彝尊編

韶九首

  
韶字鳳儀莆田人天順丁丑進士除刑部主事  
歷官都察院右僉都御史巡撫蘇松召入為大  
理寺卿累轉刑部尚書卒贈太子少保謚惠安  
有從吾滯橐

靜志居詩話彭公以左僉都御史巡視浙江兼理鹽法憐亭戶之苦繪八圖上進各系以詩雖未盡工然有元次山春陵示官吏二詩風骨若臨江詞一篇慷慨激烈信足以起頑懦其云後來姦佞儒巧言自粉飾叩頭乞餘生母乃非直筆蓋指修實錄者而言攷高皇帝實錄一修於建文元年五月至三年十二月書成再脩於靖難後至永樂元年六月書成迨九年復脩至十六年五月書成文皇帝實錄脩自洪熙元年五月至宣德五年正月書成四次纂脩總裁楊東里一人均與焉即如書傳會選許觀景清寔預纂脩之列今刊本猶書其名而實錄去之則建文諸臣在洪武中嘉言懿行槩從刪削而顛倒其是非可知已彭公所指斥殆為東里言之乎

經進鹽圖詩

八首

兩浙山水鄉古稱天地藏西望出吳淞東行踰鴈蕩利  
孔非一塗鹽征為海王泉布充京儲芻糧助邊餉庶哉  
用物宏生意不復暢薪桂與炊玉晨昏增感愴敝屋棲  
寒蘆新畬倚孤嶂懷土思依依承家如草創

右鹽場圖

山水非不佳林麓非不彫百年生聚繁分業薄如紙朝  
夕斧斤入不待黃落矣近伐嘅山童遠入虞虎兕肩重  
何足辭突黔良藉此而况煮海功昏夜無停止蒞薪苟

不力公私亦何倚歲歲事辛勤猶勝棄桑梓

右山場圖

海墀咫尺地一望如掌平材木不生植草莽徒敷榮廣  
牧良有害泛取亦難成瓜分給亭戶表絕自經營繁霜  
一以降百物俱彫零芻蕘忽萃止芟縛無留行輦運積  
官所來歲事煎烹負荷非為苦願言公課登

右草蕩圖

旭日朝沮場欣茲風色競錢鏹密如鱗沙塗平似鏡汲



曬足灰泥層層白相映易地聚成堆再淋鹹始盛方池  
藉以茅小竇暗通阱蓮實重且堅浮浮力能勝祇恐山  
雨來一簣功未竟殷勤守餘瀝坐待涵池定

右淋涵圖

蹉液泛清泠牢盆戒脩潔分番忽後時及此旺煎月一  
勺盡傾瀉萬竈俱焚蒸沈沈紅霧收鬱鬱晴波竭斂之  
白盈箕凝華燦如雪點檢入公私中心更煩熱荆妻慰  
苦顏摩挲汗流血却歎戍邊人垂老有離別

# 右煎鹽圖

詩話煎鹽之法惟海濱居民晰之書生多未詳也  
惠安是時已具其槩然不若施宿會稽志所載靡  
有剩義今節錄於後云會稽亭戶煎鹽法以海潮  
沃沙暴日中日將夕刮鹽聚而苦之明日又沃而  
暴之如是五六日乃淋鹽取滴然後試以蓮子每  
用竹筒一枚長二寸取老硬石蓮五枚納滴筒中  
一二蓮浮或俱不浮則滴薄不堪用謂之退滴蓮  
子取其浮而直若三蓮浮則滴將成四五蓮浮則  
滴成可用謂之足蓮滴或謂之頭滴然石蓮試以  
滴取最後升者為足蓮足蓮乃可驗滴有無足蓮  
者必借人已驗蓮滴較蓮之輕重為之然後為審  
編竹為槃槃中為百耳以篾懸之塗以石灰足  
受滴熾烈中滴不漏而槃不焦灼一槃可煎二  
十過淋下滴水或以他水澆之但識其舊痕以飯

熟蒸之於中，拭去面水，至舊處元滴盡在所去者。皆生水，或以甑單隔之，亦可以他物則不可分矣。孔融論云：敵軍不能救鹽池之滷，意蓋指此緣化術云：飲食過鹹，以飯單竹數條炙之，著其中，則汁便澹。蓋未易以理推也。覽此讀惠安諸詩，可以豁然無滯意矣。

小汎風日好，大汎潮汐平。袖長應善舞，課羨易為征。歲歉伊誰知，寧分雨與晴。衣食豈不急，國計良非輕。擔石四面至，倉庾一朝盈。鹽官唱簿歷，折閱頻呼聲。况乃逃亡多，荒額重加徵。展限諒未允，努力事餘生。

右徵鹽圖

三邊乏儲峙良賈勞委輸償以推海利子母多贏餘水  
膏易消耗部屋難貯諸多年積逋欠折算盡錙渺渺  
太湖畔盈盈東海隅雪山壓巨浪風帆恣所如每資藜  
藿食亦薦王侯廚誰念味中苦搔首空躊躇

右放鹽圖

近寶固貧國厚貨亦貧民漙丁有常賦催目何紛紜侵  
耗歲已久夤緣具虛文商算無從給鞭箠不堪聞富點  
自當爾哀此顛連人稱貸不見售絲穀無餘新寬減逢

優恤感激謝皇仁滄海未終竭更始重辛勤

右追賠圖

臨江詞

臨江古名邦佳麗傳自昔豈不產異人為茲壯顏色云  
何百年間不見有遺跡館人聞我言掩袂長歎息叩之  
至再三欲語還踖躅為言有姦臣名字不記憶

闕

內臺司風紀適遭陽九厄飛簡論曹

魏戮力事討賊膠固不知幾祇顧順與逆

闕

奇禍嬰六戚茲事有始末賤子請闕一神考早謝世太

孫推正嫡母妃開平家元勲載帝室隱然九鼎重姻婭

萬人敵嫌隙一以開讒言肆罔極居然尾不掉大都勢

耦國時有黃奉嘗澄子輕佻故無匹伴讀東宮中論事時

造膝一旦削王侯息惶何太亟細人暗大體國釁此焉

隙漁陽動地來六軍盡股栗齊公泰為司馬折衝乃其

職堂堂正正旗誓書嚴紀律內相方夫子孝儒早學富經

術倚馬草檄文樞機資密勿又有黃門陳迪自少稱英

特餘者亦黨人我今半遺失當其自靖時鼎鑊甘如蜜  
之死矢靡他萬古常昭晰父母且不顧爵祿何能易寄  
語謝諸親怨尤竟何益所貴士明志萬死奚足恤後來  
姦佞儒巧言自粉飾叩頭乞餘生無乃非直筆聖人順  
天命四海瞻堯日爾胡守慙愚甘心取族滅不覩解與  
胡乘時附鳳翼恩寵日以加聲名垂簡策

徐貫一首

貫字原一淳安人天順丁丑進士授兵部主事

歷員外郎中出為福建叅政遷本省右布政使  
山東左布政使拜都察院副都御史巡撫遼東  
召入為工部左右侍郎進尚書加太子太保卒  
贈太保謚康懿有餘力橐

贈別張世禎

故人成久別邂逅客都城夜雨方論舊春風又送行鄉  
關頻入夢雲樹遠含情迢遞清溪上相思對月明

王佐



佐字廷用天順己卯舉人福州衛籍官訓導以  
子鼎貴封都御史有三留橐

宮怨

芙蓉帳冷減容光  
愁倚熏籠嬾著牀  
寒氣逼人眠不得  
鐘聲催月下迴廊

詩話廷用是詩載集中侯官曹能始十二代詩  
采之游用之夢蕉詩話謂南寧伯毛舜臣留守  
南都灑埽舊內見別院牆壁多舊宮人題詠年  
久剝落不可辨識其一署曰媚蘭仙子書即此  
詩末二句也當出好事者傳會不然裕陵定都  
北京之後康陵未南巡以前安有宮人以廷用

詩書之南  
內壁乎

張元禎一首

元禎字廷祥南昌人天順庚辰進士累官吏部  
左侍郎兼翰林院學士掌詹事府事天啟初追  
謚文裕有東白先生集

游東郊

招提回首日沈西十里香風送馬蹄不是習家池上飲  
傍人休笑醉如泥

沈暉一首

暉字時暘宜興人天順庚辰進士累官右副都御史巡撫河南有豫軒集

夏夜悼亡

青雀西飛竟不歸芙蓉猶剩舊羅幃山齋十日黃梅雨  
誰與熏籠夜焙衣

鄭紀一首

紀字廷綱仙游人天順庚辰進士累官南京戶

部尚書有東園集

林雨可云東園詩得力于靜故能舉止安雅

詩話尚書無詩名然如古塹斜連江樹沒飢鳥低傍野人飛橋頭雨歇溪初溜天際雲收山漸

多亦自琅燕可誦

送林慎學之官

相送東郊去秋雲驛路寒祇因為客久欲別故人難馬  
向花間度琴攜竹外彈歸來不覺晚月色滿吟鞍

秦

夔

十一首

夔字廷韶無錫人天順庚辰進士歷官江西右

布政使有五峰遺橐

邵國賢云廷韶詩始馳騫中唐久之得其風格既而

學杜復參諸蘇黃以下數家故所就如此程克勤云公詩清麗豐蔚不名一家施愚山云

廷韶詩流麗有唐人風

## 東安道中

南人喜乘舟鞍馬非所便自我離京師陸行苦迤邐長  
驅竟終日黃塵暗幽燕平原莽千里四顧無人煙况茲  
冬欲暮寒風正淒然霜嚴裂肌膚指直不得拳僕夫亟  
告勞長跪向我前下馬語僕夫窮塗須勉旃丈夫豈兒

女壯志恒在邊微勞詎足惜去矣行策鞭

送人還松江

金陵城中花滿煙金陵陌上酒如泉送君臨歧一握手  
欲別未別心茫然疋馬遙遙向東去黃金作鞭光照路  
長安雖好不如家翹首吳門隔煙霧君家遠在雲水鄉  
正近吳王舊獵場海錯登盤玉脂滑鮮蓴出水銀絲長  
荒亭鶴去空塵跡三高祠前秋月白惜君未得從君行  
斜日無言正愁寂

登觀瀑亭

麻姑之泉天下名有泉不可無此亭奔流直下蒼崖裏  
千丈玉龍飛不起鏗金碎玉聲潺潺恍惚置我匡廬間  
銀河句好續不得日暮悠然騎馬還

同金廣信宗器遊番湖

番湖水落秋容冷碧色澄鮮三萬頃樓船嗷嘈何處來  
十幅蒲帆弄秋影霜晴九月葭葦枯芙蓉著花秋滿湖  
吳興已遠郭熙老誰為寫此秋江圖汀洲遠近迷雲樹

東去滄波急如注康山一髮天際橫傳是先皇洗兵處  
當年血戰湖水黃日月照耀旌旗光鼎湖龍去不復返  
只有鴈鶩飛茫茫天開大澤雄今古氣撼東吳及南楚  
巴陵洞庭何處邊目斷潯陽送樓櫓北風獵獵握雙旌  
此行奇絕如登瀛風波平地不須起向來魂夢今猶驚  
浩歌蓬底還搔首却憶同行信州守萍水飄零盡白頭  
相逢且醉餘干酒

贈虞永錫赴金庭塾館



西溪先生頭半白十年常作金庭客  
慣說金庭山水清  
嗟余俗眼何由識  
新春示我山水圖  
金庭乃在東南煙  
浪之具區  
洞天福地仙所都  
靈芝瑞草無時無  
危峰倒  
插青天孤下涉  
阻險連重湖  
秋風颯颯吹黃蘆  
白波漫天鴈驚呼  
沙頭二老翁  
衣冠一何偉  
烏沙籠頭髮垂耳  
笑看雲山弄雲水  
就中一叟豪且雄  
恐是近世天全翁  
領客嘗遊湖水東  
脫屣富貴尋崆峒  
英賢遺跡轉眼空  
好事寔入茲圖中  
不然胡為避世士  
被服却有今人風

余生亦愛金庭好對畫題詩心懽懽會約先生作勝遊  
他日風流成四老

和謝武選齋居

長樂踈鐘曉龍墀細柳春天香飄御仗紫袖引才人萬  
乘求賢切諸公奏疏新幸逢虛己日忠讜在忘身

過高郵

四顧無山色蒼茫入望遙城池百戰在魚蟹四封饒小  
市黃茅店孤邨白板橋停舟問民俗風景頗蕭條

久雨

劍外天常漏江南雨亦多陰雲連晦朔潦水接江河漫  
說禾生耳還聞麥化蛾憑誰問元宰調燮意如何

南山小隱

茅屋住山丘丘中事事幽茶香和雨摘果熟帶霜收石  
鏡當窗見山泉隔幔流何時謝軒冕來伴竹林遊

望泰山

中天積翠鬱重重勢入青冥望不窮山上白雲今古是

漢王虛信起封中

賞芙蓉

獨倚秋風取次開  
小園攜酒幾番來  
勸君莫惜花前醉  
昨日主人安在哉

陸 鈇 一首

鈇字鼎儀崑山人  
天順甲申賜進士第二授翰林編脩遷脩撰陞太常少卿翰林侍讀時與張

泰陸容稱崑山三鳳有春雨堂稿

李賓之云張亨父陸鼎儀

未第時皆有詩名亨父天才敏捷奇思硬語人  
莫撓其鋒鼎儀稍後作而意識超詣凌空徑趨  
擺落塵俗雖或矯枉過正弗恤也

詩話鼎儀與西涯同登第西涯時年十七鼎儀  
瓊林醉歸詩所云行過玉河三百騎少年爭說  
李東陽是也西涯好推挽人才求詩者至填塞  
戶限乃賦詩以止作詩鼎儀間之失笑戲作八  
止詩貽之西涯申雞酒之約未踐也會謝鳴治  
陳師召促西涯題詠西涯遂渝止詩之約偕謝  
陳兩公載酒鼎儀邸舍李明仲羅亨父亦至即  
席分韻詩成書之卷軸鼎儀又嘗與陸文量飲  
朱懋暹宅有教坊弟子王秀伯觴夜深風冽瑟  
琶絃屢斷主人以洞簫繼之秀合絃按拍清歌  
數曲歌詞有學士波字蓋方言也鼎儀為賦詩  
紀其事有醒後空慙學士波之句當日諸公逢

太平盛際翰苑風流經過輒成勝引予嘗過北  
平孫侍郎蟄室獲觀西涯陵祀歸和鳴治騎字  
韻詩和者數十人裝成行看子足稱玉堂  
嘉話也鼎儀郎在新堤今已不知其處

三月八日與亨甫歸自城西

參差宮樹殿東西樹裏青山落日低回首旌旗猶未定  
晚來風起玉河堤

李東陽五十七首

東陽字賓之茶陵人天順甲申進士改庶吉士  
授編修累官少師兼太子太師吏部尚書華蓋

殿大學士卒贈太師謚文正有懷麓堂前後集

南行北上諸豪

徐子元云長沙大韶一奏俗樂俱廢中興宗匠邈焉寡儔獨擬

古樂府乃楊鐵崖之史斷此體出而古樂府之意微矣 穆敬甫云李公才情兼美於何李有

倡始功大似唐之燕許 王元美云李西涯如

陂塘秋潦汪洋澹泊而易見底裏又云長沙公

少為詩有聲既得大位愈自喜撫拔少年雅俊

者一時爭慕歸之雖模楷不足而鼓舞攸賴長

沙之於何李也其陳涉之啟漢高乎又云嚮者

於李賓之擬古樂府病其太涉議論過爾翦抑

以為十不得一自今觀之奇旨創造名語疊出

縱末可被之管絃自是天地間一種文字若使

字字求諧於房中鏡吹之調取其字句斷爛者

而模仿之以為樂府如是則豈非西子之顰耶

鄆之步哉胡元瑞云成化以還詩道旁落唐人風致幾於盡隳獨文正才具宏通格律嚴整高步一時興起何李厥功甚偉是時中晚宋元諸調雜興此老砥柱其間固不易也又云國朝詩流頗達無如孝廟以還李文正楊文襄石文隱謝文肅吳文定程學士凡所製作務為和平暢達演繹有餘覃研不足是時厥後李何並作宇宙一新矣顧玄言云文正以大雅之宗推轂後進學既該博詞亦宏麗陳卧子云文正網羅羣彥導揚風流如帝釋天人雖無與宗派實為法門所貴林與可云西涯樂府得古詩之遺風刺竝見含蓄可味使人自得於言外別為一格矣而不可

靜志居詩話文正弘獎羣英力追正始由其天材穎異長短豐約高下疾徐滔滔莽莽惟意所



如其自序謂耳目所接興況所寄左觸右激發  
乎言而成聲雖欲止之有不可得而止者此自  
得之言也昔賢以大謝繁蕪為累大陸才多為  
患此翁亦然若其擬古樂府因人命題緣事立  
義別裁機杼方之楊庶夫李季和輩似遠勝之  
至或剛而近虐簡而似傲文之佳惡文正蓋自  
得之矣

### 申生怨

十日進一昨君食不得嘗讒言豈無端兒罪誠有名兒  
心有如地地墳中自傷兒生不如犬犬得死君傍天地  
豈不廣日月豈不光悲哉復何言一死以自明

縣山怨

五蛇上天一蛇螫縣山經月火不滅君王恩重翻為讎  
不如放作山中囚君王有臣一非少貪天之徒但自保  
臣心見母不見君誰言母死非君恩今辰何辰夕何夕  
留與千秋作寒食

屠兵來

兒勿啼屠兵來趙宗一綫何危哉千金賣兒兒不死真  
兒却在深山裏妾今有夫夫有子死兵易立孤難九原

下報無慚顏趙家此客還此友穿何故亡盾何走誰言  
趙客非晉臣當時嬰杵為何人

### 新豐行

長安風土殊不惡太公但念東歸樂漢皇真有縮地功  
能使新豐為故豐人民不異山川同公不思歸樂關中  
漢家四海一太公俎上之對何息息當時幸不烹若翁  
淮陰歎

營門晝開齊犬吠蒯生相人先相背古來烏盡良弓藏

近時刎頸陳與張功成四海身無地歸楚楚疑歸漢忌  
極知猶豫成禍胎時乎時乎不再來君王恩深辯士走  
淮陰胸中血一斗婦人手執生殺機赤族不待君王歸  
君王歸神為惻獨不念秋毫皆信力

殿上戲

殿上戲丞相嗔丞相勿嗔吾弄臣臣可弄不可狎節使  
不來臣已殺君王有道臣職遂細柳營中親按轡

文成死

文成封五利封神仙只在東海東文成死五利死天下  
神仙皆妄耳漢家武皇帝者英昔何惜矣今何明君不  
見百年身萬年計前秦皇後唐帝

姦老革

姦老革天下能有多許賊潼關以東大有人悔不盡殺  
東都民民不欲多多即亂安得龍舟數千夫八萬君不  
見江都城外人圖儂那能更到丹陽宮

卿勿言

卿勿言朕自思南詔覆師君不知卿勿憂朕自保范陽  
弄兵苦不早卿邪誰邪高與楊非姚非宋還非張有言  
如此尚不用豈有藥石鍼膏君不見咸陽老人能直  
諫何曾得覩君王面

青巖山

青巖山甄郎高風不可攀祿山使者封刀還入東京見  
黃蓋帝敕偽官階下拜鄭虔貶死王維生故人獨有蘇  
源明君不見舞象悲啼樂工哭賊斫工尸分象肉

司農笏

司農手中無寸鐵奮笏擊賊賊腦裂賊雖未死氣已折  
奉天子雙淚橫十年棄卿真負卿臣身區區勞記憶  
平原太守曾未識

十六州

契丹助晉兵一號三十萬晉人報契丹一數一匹絹三  
十萬絹未足惜一十六州空棄擲遂令宋統成偏安中  
原以止無幽燕金元相承二百載干戈甫定旋甕鎧至

今五鎮接三邊不備西陲備東海

安石工

端禮門金石刻丞相手書姦黨籍長安役者安石工不  
識人賢愚但識司馬公卑疎不敢預國事幸免刻名為  
後累匹夫憤泣天為悲黃門夜半來毀碑碑可毀亦可  
建蓋棺事久乃見不見姦黨碑但見姦臣傳

參謀來

新將代舊將去參謀來軍有主受命攜不受戰參謀行



真獨斷宋家養兵二百秋大功竟屬書生收翻令媿死  
劉揚州君不見陝西歸來笏畫地遺恨他年六州棄

兩太師

和議是塞外蒙塵走天子和議非軍前函首送太師議  
和生議戰死生國讎死國恥兩太師竟誰是

花將軍

花將軍身長八尺勇絕倫從龍渡江江水渾提劍躍馬  
走平陸敵兵不能逼主將不敢嗔殺人如麻滿川谷徧

體無一刀鎗痕太平城中三千人楚賊十萬勢欲吞將  
軍怒呼縛盡絕罵賊如狗狗不狎檣頭萬箭集如蝟將  
軍願死不願生作他人臣部夫人赴水死有妻不辱將  
軍門將軍侍婢身姓孫收尸葬母抱兒走為賊俘虜隨  
風塵寄兒漁家屬漁姥死生已分歸蒼旻賊平身歸竊  
兒去夜宿陶穴如生墳亂兵爭舟不得渡墮水不死如  
有神浮查為舟蓮為食空中老父能知津孫來抱兒達  
行在哭聲上徹天能聞帝呼花雲兒風骨如花雲手摩

膝置泣復歎雲汝不死猶兒存兒年十五官萬戶九原  
再拜君王恩忠臣節婦古稀有嬰杵尚是男兒身英靈  
在世竟不朽下可為河嶽上可為星辰君不見金華文  
章石室史嗟我欲賦豈有筆力回千鈞

尊經閣

尊經閣閣高不可攀前有文宣宮後有鍾陵山

玉堂下直

岸幘斜陽下疎林開遠山新涼灑衣袂爽氣清容顏林

端見初月素彩生雲間  
褰裳步花影欲動愁闌珊  
向來竹林遊暫到已復還  
寧知一畝內迴若離市闌  
浮生且為樂及此一日間

陳玉汝所藏朱澤民畫

睢陽書家流作畫如作草  
松根石峻增健筆凌絕島  
垂蘿飄人衣盤石坐不埽  
鳴琴聲差差石籟風稍稍  
君看蕭散姿稱彼林下老  
遺鱸百年內嵐氣濕不槁  
陳郎湖海情得此恨不早  
我生不學畫入眼分醜好  
嘗觀耆舊

傳歎息風流少此意君獨知丹青安足道

師召席上餞邵文敬戶部使淮安得作字

玄雲鬱重陰霖雨久逾大平田偃頽波萬景同一挫  
纍黍穗落百畝不盈箇淮陽舊宜麥未足供甌磨稊稗  
價亦增誰能問粳糯官租苦未給生理安可作城市多  
游民山林有遺餓流離及溝壑去住總無那地連兩畿  
邇業恐千家破近聞恩詔下已放今年課漢臣發諸廩  
唐法通百貨王事須賢勞地曹有良佐名辭鴻臚籍檄

自尚書座行哉車馬艱詎免泥塗浼東南民力竭要使  
皇仁播官雖問升斗職豈在揚簞平生翰墨場珠玉生  
咳唾簿書劇裁決餘暇得酬和羣情恣幽眇品類入按  
邏德澤乃膏腴文章比糠粃舉世輕迂譚茲言我當坐  
偶託平生交因君識吾過君當策勲伐極力起貪懦聊  
因贈行什預卜還朝賀

題王維詩意圖

平田渺成湖仲夏月多雨汀鷺濕不飛林鶯澀還語邨

煙多乞鄰饁餉常及午柴門無鎖鑰出入隨杖屨白鷗  
似相識亦足忘爾汝王丞詩家流畫格亦天與君看百  
代遺摹搨尚如許吾生慕丘壑偶此繫冠組試問松下  
翁幾人同出處

送陳先生致仕得臆字

成化己亥冬公來自南國維時龍興節奉表宸旒側入  
朝未浹辰具疏寫衷臆臣年七十二鬚髮不復黑乞身  
謝圭組歸老東南域願為南極星中夜常拱北時當太

平世聖壽千萬億臣雖在畎畝永荷陛下德聖皇眷者  
舊曰汝予輔翊古稱老成人豈獨賴膺力吾當獎休退  
卿意誠悃悞加官號冢宰名位班九棘馳封及三世茲  
典尤絕特公章再入省請解尚書職臣方避華要而敢  
蒙顯陟王言重丁寧公意增感刻願書歸榮字堂扁揭  
華織江山佳麗地從此生顏色再拜送公歸臨風遠相  
憶

困暑次韻白洲



高堂遞晴陰炎煬氣呼闐熾同洪爐然溽入厚地黯繁  
星夜方搖淫雨晝仍濫炎光石成焦暝色山帶靨義輪  
燄赫赫雷轂聲轆轤龜坼行在田濤翻坐平檻占風想  
乾鵲吠日驚蜀獺彼浴空羨鳬吾冠不如蜚甘泉冷將  
濯惡木繁可斬快心甘獨勞炙手竟誰犯周扇懷仁風  
陶窗仰清範雖無簿書煩頗覺餐食減顰為窮兒愁怒  
作壯士喊亦有歲寒交綈袍義思范豈無雪夜訪杯酒  
情憶湛天時手中環世事波上艫晚尋東籬菊秋種南

山黠思君正執熱有袂不可摻

賀鼎儀遷諭德得檢字

華蓋天穹崇青宮地深儼同時侍從臣一一皆妙檢陸  
君偉文行不抗亦不諂銛如囊中錐穎脫不受掩年勞  
秩屢遷德諭官曷忝名厓黼展記薦豈公卿剡平生耐  
官職寵極翻自斂須知啟沃功不獨事編檢姓字符鼎  
彝文章歸琬琰非才獨慙予同第名久玷交游二十年  
道義足薰染攀躋竟何能時歲驚荏苒勲業乃攸期榮

光詎相豔努力當壯齡時哉此其漸

示用兒效玉川子作

夜坐苦不樂作詩示用兒用兒爾何來來自東南陞自  
言廣西人州縣已忘遺但知姓李氏世業本巫醫家有  
三頭牛有田可耘耔當年靖州蠻作亂勞王師夜聞狼  
兵到勢若虎與貔我耶被殺死血肉交淋漓我孃亦被  
虜存亡未可期官司簡少俊閹割隨俘累用兒年十三  
廣額身尪羸生來左目瞽幸免殘膚肌紅船載白粳驛

遞來京畿兵曹奏名籍給配在有司臣愚本無功恩與  
公侯齊用兒亦何物御筆蒙親批彤庭頓首謝髻巾歸  
提攜煮羹為汝餐縫帛為汝衣役不忍汝勞過不忍汝  
笞居遣用兒侍行令用兒隨殷勤語子姪慎勿陵虐為  
丁寧戒僮僕疾病相扶持緬思先皇德欲報何能追賜  
生尚必畜況此非豚雞今皇兩僮賜本出思思夷岑梁  
年十一吳也二歲差渠視汝為兄汝可弟視之班行若  
鴻鴈戲弄吹塤簫渠小不足責汝長教所宜用兒爾來

前訓汝好言詞清晨起必早日暮眠當遲操畚埽廳堂  
汲水澆園畦客來捧茶果客去收書棋有口莫喫酒酒  
醉死路歧有手莫做賊做賊送頭皮人生無貴賤但問  
所從誰長為官人奴勝作僮與黎用兒爾誠駢告汝汝  
不知垂頭睡莫對吾自吟吾詩

習隱 二首

咿啞復咿啞隔牆聞水車車翻水汨汨如在東鄰家當  
軒理嘉樹傍檻移新花一澆潤枯槁再濯無塵沙濟川

恐無用學圃良非差  
房山有南畝海子餘  
西涯安得謝簪纓  
悠悠送年華

暑雨忽新霽曾軒開  
碧山浮雲避素月  
夜色明松關流螢  
遞隱見宛在深林  
間埽石坐彈絲天  
風下鳴環瓊樓正  
在望佇立難為攀

夜過邵伯湖

蒼蒼霧連空冉冉月  
墮水江湖日浩蕩  
行役方未已羈棲  
正愁寂况乃中夜  
起

長江行

大江西來是何年奔流直下岷山巔長風一萬里吹破  
鴻濛天天開地闢萬物茁五嶽四瀆皆森然帝遣長江  
作南瀆直與天地相周旋是時共工怒觸天柱折遂使  
后土東南偏女媧補天不補地山崩谷罅漏百川有崇  
之叟狂而顛坐看南國赤子淪深淵帝赫怒罰乃罪神  
禹來乘四載驅大章走豎亥黃龍夾舟穩不驚直送馳  
波到東海朝離巴峽暮洞庭九派却轉潯陽城縈紆南

徐萬餘里更萬餘里通蓬瀛君不見黃河之水天上下  
其大如股空縱橫長淮清濟出中境曷敢南向爭權衡  
千流萬派瑣瑣不足數雖有吐納無虧盈下亘厚地上  
摩高空日月出沒蛟龍所宮竒形異態不可以物象但  
見變化無終窮或如重胎抱混沌或如顥氣開穹窿或  
如織女拖素練或如天馬馳風駿空山怒哮飽後虎巨  
壑下飲渴死虹或如軒轅鑄九鼎大冶鼓動洪鑪風或  
如夸父逐三足曳杖狂走無西東或如甲兵宵馳聚嘯



滿山谷或如神鬼晝露萬象出入虛無中吁嗟乎長江  
胡為若茲雄人不識無乃造化之奇功天開九州十有  
二山南北竝峙江流其間堯舜都冀方三苗尚為頑魏  
帝倚天歎征吳但空還吁嗟乎長江其險不可攀古來  
英雄必南驚我祖開基自江渡古來建國惟中原我宗  
坐制東南藩始知天險不足恃惟有聖德可以通乾坤  
長江來自西極包人寰環帝宅吾來何為為觀國汎吳  
濤航楚澤壯神功歌聖德聖德浩蕩如江波千秋萬歲

同山河而我無才竟若何吁嗟乎聊為擊節長江歌

風雨歎

壬辰七月壬子日大風東來吹海溢崢嶸巨浪高止山  
水底長鯨作人立愁雲壓地濕不翻六合慘澹迷乾坤  
陰陽九道錯白黑鳥兔不敢東西奔里人蒼黃神屢變  
三十年前未曾見

正統甲子歲

東邨西舍喧呼遍牒書走報

州與縣山厓谷洶豺虎嗥萬木盡拔乘波濤洲沈島滅  
無所逃頃刻性命輕鴻毛我方停舟在江皋披衣踞牀

夜復晝忽掩青袍涕雙透舉頭觀天恐天漏此時憂國  
况思家不覺紅顏坐凋瘦潼關以西兵氣多蘆笳吹塵塵  
滿河安得一洗空干戈不然獨破杜陵屋猶能不廢嘯  
與歌世間萬事不得意天寒歲暮空蹉跎嗚呼奈爾蒼  
生何

夜過仲家淺閘

日維乙未月丙戌青天無雲月出東舟人喧歷夜濤發  
翻沙轉石紛出沒是時水淺舟在地牖門崔嵬晝方閉

牘官醉睡夫走藏倉卒招呼百無計民船棄死爭赴牘  
楫倒檣推動交碎舟人號咷乞性命十里呼聲震天地  
我時兀坐驚春撞攬衣而起心傍徨同行無人僕隸散  
獨與船底相低昂攀崖陟磴不得上咫尺如在天一方  
流行坎止信有數向來蔑視淮與江霜風欺人衣袂薄  
呼童酌酒累數觴燈殘酒醒牘亦過北斗墮地天茫茫  
送平江伯陳公總督脩河兼簡劉都憲時雍

黃河西來忽東決張秋舊堤先受齧奔波赴海勢不停

百里漕渠一時泄官船賈船如山壅河底沙乾日欲裂  
九重南顧回舜瞳三命中朝持漢節陳公舊是恭襄孫  
奕代簪纓萬人傑爭誇仙種非凡材復道家傳有真訣  
兵符夜檄鯨鯢走將令晝驅雷電掣指揮能事天地回  
坐計功成同解結時方六月霖雨多地苦沮洳况炎熱  
民窮到骨聲徹空忍使鞭笞汗成血極知國計須元氣  
乍可因時治癥瘕比聞水發舟已通暫遣丁歸待農輟  
三屏永作洪濤鎮一蟻不潰金隄穴古來大事當遠圖

豈論竹頭兼木屑慣從前史鑑興衰已聽高譚能激切  
湖南中丞久奉使頗覺憂勞成耄耋因公寄謝平生交  
自媿官曹容逸拙

靈壽杖歌

吾聞武當之山四萬二千丈半在雲根半天上不知三  
十六宮何處稱絕竒產出靈株非一狀蛟螭蟠拏露頭  
角熊經樹顛虎山脚根盤節錯相糾纏含風飽雪經炎  
寒九年洪水之水浸不殺十日之日暴烈何時乾梯懸

磴接跬步不可上誰采青壁紅琅玕見之羨者不容口  
錫以嘉名曰靈壽爪之不入行有聲金可同堅石同久  
吾家此物舊所有神與相扶鬼為守自從病足跛曳不  
得前已覺山林落吾手一病經旬不出門手中此杖嗟  
猶存下牀敲足立不定此時託子以為命不顧四體無  
微疴但願謝病歸山阿左扶右策夾以二童子下可涉  
園徑上可凌坡陀願栽萬木截萬杖窮崖陰谷生森羅  
靈兮壽兮此物儻可致直遣四海赤子頭雙皤

題黃宗器秋官所藏何太守山水圖

濕雲浮空山欲動，亂壑回峰互吞湧。  
當溪獨樹雨冥冥，青苔覆地春陰重。  
深山白石幽人居，釣簾寂寂坐看書。  
竹橋入林野有簌，草閣傍水門無車。  
行人細路隔山脚，曳杖前登後還却。  
浦口輕舟信往還，鐘聲遠寺空寥廓。  
此中可釣亦可耕，不然且濯滄浪纓。  
酒酣夢覺兩相失，此興豈獨憐丹青。  
風流太守何侯筆，三十年來已蕭瑟。  
君今愛惜須久傳，予亦題詩坐終日。



劉尚質南樓題王舜耕山水圖

溪聲潺湲雜林壑山勢蜿蜒去還却浮雲欲起未起時  
半在溪頭與山脚入空高鳥飛欲盡背屋斜陽慘將落  
更無剩地與閒人縱有紅塵何處著南畝老翁雙鬢斑  
筆法頗似高房山少年豪宕老疎放往往醉墨留人間  
平生畫癖兼山癖一見此圖三歎息媿我不如樓上人  
日日開窗看秋碧

張侍御世用所藏山水圖歌

秋山日落川氣黃樹影下映寒潭蒼叢篁入林豁蒙翳  
石角路轉山東岡茅堂對山復面水高者可履深可航  
閉門却埽動經月落葉委地苔覆牆豈無山客跨款段  
亦有孺子歌滄浪吾生早覺簪組累十年丘壑成膏肓  
畫圖彷彿見此景褰裳欲渡川無梁空堂五月爍如火  
使我鬱塞迴中腸安得盤陀一片石坐醒殘醉生餘涼  
君今持節行萬里要遣霜雪清炎荒請看窮谷最深處  
或有隱逸藏聲光揚清激濁付公等吾欲拂衣辭太倉

書廉夫先生書畫卷後

廉夫書法天下豪坐驚風雨隨波濤有時意匠入幽眇  
力與造化爭纖毫仰觀千年俯一世紛紛弄筆皆兒曹  
書家論定價亦定須識我翁人品高戲將水墨灑縑素  
如飫粱肉甘醯糟殘山剩水世莫覩流落數紙青蒲萄  
一登翁門遂隔世齒頰未獲霑餘膏如遊神山見石髓  
頃刻再往不復遭莆田鄭郎得寶藏明珠雜佩金錯刀  
摩挲兩眼百過讀使我涕淚盈青袍三年留玩一朝去

久假似覺歸心勞泰山東顧日西墮欲往從之中鬱陶  
詩成起立歲將暮空庭短髮空蕭騷

徐用和侍御所藏雲山圖歌

何人醉寫雲山圖浮雲瀕洞山模糊空明射地日漏影  
稍覺林樹開扶疎平原蒼莽不知處忽有細路通榛蕪  
茅堂枕山半閣水卷幔正對前峰孤幽人深居不出戶  
縱有鄰舍無招呼低頭把卷苦吟諷語暗不辨楚與吳  
中流櫂歌似相答欲斷未斷聲嗚嗚雲多水闊望不見

知是滄洲舊釣徒長安六月晴復雨若非塵土還泥塗  
城中見山如見畫剛可髣髴求形模山猶可見水莫涉  
尺潦豈足容長艫十年舊遊憶南國歲月催人非故吾  
鸚鵡洲前漢陽樹此景此詩今有無因君此圖意披豁  
便欲買櫂遊江湖

華山圖歌為喬太常宇作

嗟哉此山吾不知其幾千丈兮但見巍然屹立乎天中  
中有三峰聳拔而直上部位離立西南東諸峰羅列在

其下有似長老隨兒童縱令立表以識不得算雖有記  
里之鼓難為功我聞上古之世開鴻濛沙水盪汨相結  
融融者為泥滓結者為石為山峰石堅山積理亦爾試  
看崛拔斬削別有造化之神工山名五岳此其一特出  
似異衡與嵩天門重重隔煙霧鐵鎖懸厓引長路樞衣  
欲進苦不前十步行時九回顧山腰流泉如瀑布仙掌  
撐空若承露虎踞龍蟠各有形鸞鵠舞紛無數置身  
忽在中峰頂極目乾坤莽回互秦關蜀徼院塞豈足論

遙指扶桑最高樹噫吁噉自有天地兮即有此山萬物  
代謝兮山巋然古人今人到者相接踵誰復騁步窮其  
巔我生好古厭塵俗險絕獨慕昌黎韓昔年南遊復東  
眺二嶽只尺不一攀有客西來詫我以大觀歌聲上徹  
秦雲端畫圖指點向空廓已覺天上非人間喬生喬生  
如此好奇者世不可以多得安得與予一日遍歷千巔  
岿

王孟端竹長卷

九龍山翁興豪放手持蜿蜒青竹杖酒酣怒擲江中流  
化作一龍長數丈一龍躍起一龍隨倏忽羣龍駭奔浪  
穿沙觸石連雲霧頭角森森各相向其間小者稱獬龍  
鱗甲蛻盡風神同人道此翁善劇戲造化乃在指掌中  
君不見九龍山翁去何許九龍山上多風雨素壁空堂  
杖影寒夜半無人作龍語

鍾欽禮雲山圖為史都憲天瑞題

江南畫史誰專門會稽老鍾清且溫圖成長練置急雨



筆墨減盡風神存陽厓陰谷半明翳上有煙雲時吐吞  
深林翦鬱石塊磊野水不斷天無痕當其得意每自許  
傲睨恥受王公尊勾餘拙翁善墨竹史號勾餘一拙二者異法  
須同論謂渠畫格自有派房山之子南宮孫手持此圖  
自東海海色尚帶扶桑暎千巖秋聲萬壑樹只尺不辨  
東西邛幽亭野集者誰子似有賓主無琴樽問之不荅  
若莞爾物外別自成乾坤我生愛山復愛竹對此病目  
開餘昏君看巖谷最深處好著數箇蒼筤根

題丁御史同年墨竹走筆長句

浙江之東縣新昌乃在千巖萬壑之中央側身重足恐  
無路五步一澗十步岡君家茅屋此卜築白石叢抱青  
簣簷西接林薄南通塘低者出地高出牆江南此物賤  
如草買種不費錘與筐野生石迸小如指一夜風吹還  
尺強煙鉏雨櫛歲屢改舊葉換盡新梢長青苔白石淨  
如埽吳紵越羅生雪霜脫巾箕踞坐其下野叟林夫相  
與狂吹洞簫飛羽觴鳴玉琴舞霓裳陰風颭颭左右至

耳熱不受秋山涼醉中恍惚無定所顛倒萬籟隨宮商  
忽如壯士入沙場鐵騎夜撼陰山疆不聞鼓角動但見  
矛戟森開張忽如仙人來帝傍翠環金節聲鏘鏘不聞  
鸞鶴叫但見雲中雙鳳皇蛟龍起舞鬼陸梁復如扁舟  
渡瀟湘九疑山前鵲鵲泣二女聞之雙斷腸是時騷人  
醉半醒孤棹萬里回滄浪十年宦游隔江海此興落落  
何由償深知良工心獨苦愛畫不減青琳琅往時王孟  
端近者夏太常二公之畫世所藏此物何為在君堂君

心自有百鍊剛見此意氣俱飛揚烏臺退食宴佳客看  
竹不礙肩輿郎我當攜琴載雙鶴坐子林間青石牀

錢唐江湖圖為喬少卿希大作

錢唐江頭江倒流中有潮聲號萬牛堆銀如山雪如屋  
遠影滅沒當空浮千峰將頽樹欲禿海若股栗天吳愁  
來船歡欣勢自下瞬息千里無淹留去船乘危貴得正  
力盡一過且復休躋攀分寸偶失手頃刻下飽黿與鱖  
由來咫尺不自覺遠望不敢凝雙眸客來未到膽已落

借問同行還見不何人嬉笑欲起舞越東老翁搔白頭  
羣兒招呼或助叫倏忽過耳風颼颼達士遐觀得奇賞  
七澤五湖同一漚天道虛疑月盈缺世情妄假人思讎  
復將險巧作戲劇鄉里少年誇善汨潮來潮去亦何意  
人間萬事良悠悠我時渡江不相值空對燕客談杭州  
壯懷高興兩莫遂三十五年秋復秋誰將妙思入畫本  
似與造化爭雕鏤酒酣月落不知處夢醒尚作江南遊

題湖山春曉圖

湖船著水平無舵篷上使篙篷下坐山光四面錦屏開  
橋影中天彩虹卧輕鴉拂樹還千點老鶴叫空時一箇  
宴客遙將綺席隨游人不惜青鞵破江南風物今餘幾  
看畫題詩兩無那却恐湖山畫不如他年自買扁舟過

子昂畫馬卷

翰林學士真天人平生書畫皆通神自言少小嗜毫素  
寸紙遍作雲煙痕老來意態盡物理畫馬欲過曹將軍  
此圖似出西域種骨法權奇氣軒聳將身蹴地跼不前

矯首見人驚欲踊燕家死馬猶堪賣況此風神解飛動  
在野須教一顧空登臺未覺千金重崔郎愛畫復好奇  
向來得此信且疑為渠指點是真跡老我聰明非昔時  
圖窮忽見銀鈎筆復訝驪珠海中出江南贗本今已多  
入眼自須分甲乙世人得者惟見一至寶逢時故難匹  
從此高堂展玩頻明窗淨几無長日

題許廷冕職方畫

路轉循岡背橋回傍水根幽人不到處茅屋自成邨浦

樹經秋落山鐘向晚昏偶然一攜手相與倒芳樽

太皇太后輓歌詞

北郭車塵遠西陵樹色重地棲華表鶴雲逐鼎湖龍  
命使三時奠空山半夜鐘他時駿奔地冠佩想追從

九日渡江

秋風江口聽鳴榔遠客歸心正渺茫萬古乾坤此江水  
百年風日幾重陽煙中樹色浮瓜步城上山形繞建康  
直過真州更東下夜深燈火宿維揚



胡忠安公輓詩四十韻

文廟臨朝日英皇復辟年我公台鼎貴臣職始終全舊

錫恩榮榜仍居侍從員阜橐繁出入彤陛儼周旋擾擾

羣疑會皇皇四牡篇路應窮地軸歲屢變星躔

公受密命巡行

四方前後曉謁班留筍宵歸炬擁蓮至今天上語不遺

十有七年外人傳少海驚波定金滕密疏虔論功同李泌辱命

豈張騫南國非旁郡東僚亦左遷獻陵貽睿想宣室問

遺賢典禮煩咨岳為舟憶濟川廟廊資治理帷幄贊兵

權討逆東平漢從征北過燕從容陳俎豆談笑却戈鋌  
仗鉞風塵際留司雨露邊兩曹兼掌握三少累登延紫  
誥蛟龍織珍羞玳瑁筵篆分銀印細花簇錦袍鮮榮戟  
城西第桑麻海上田雲霄三接近優遇一時專綠野家  
山在丹心聖主憐挂冠雙鳳闕歸櫂五湖船老子元知  
足陶朱不愛錢弟兄頭總白賓客戶常闌面受妻公唾  
身無董氏弦恩魚隨網散駟天上階眠

公有犬當庭卧  
公出入必避之

碑板尋常見醫方次第詮甕留京口釀餅引惠山泉壽

愷堂何媿忠安謚有焉相台秋正拆卿月夜虛圓異骨  
殊凡品前身本解禪

公自言天池和尚後身

浮生過九十空界出

三千海內文章伯人間富貴仙姓名兒女說簪笏子孫  
聯桃李當時盛葭莩後代連高山嗟仰止先輩已茫然  
日月居諸裏江湖涕淚前賦詩禪國史詎有筆如椽

### 吉安府

山勢西來斷江流北去平萬家深樹裏聞是吉州城

### 見月

野宿秋雲暝溪行曉霧寒歸心與明月夜夜到長安

西園秋雨詠苔

豈不愛佳客畏人踐我苔西園十日雨三徑不曾開

慈恩寺

水繞湖邊樹花垂石上藤長來寺前坐不識寺前僧

嘉杭道中

煙籠近浦沙白雨急長溪水渾一夜江頭潮滿釣船撐

到柴門

春園雜詩

三月三日佳麗辰五十五年衰病身閉門一枕午時夢  
江草江花無數春

長沙竹枝歌

二首

馬殷宮前江水流定王臺下暮雲收有井猶名賈太傅  
無人不祭李潭州

江頭彩旗耀日明船上撾鼓不停聲湖南樂事君記取  
五月五日潭州城

謝

鐸一首

鐸字鳴治天台人天順甲申進士選庶吉士授  
編修歷官南京國子祭酒移疾歸起為禮部右  
侍郎掌祭酒事卒贈禮部尚書謚文肅有桃溪

淨橐

李賓之云方石詩沈  
著堅定非口耳所到

桃溪

淺水難容櫂繁花自作邨分明幽絕地不是武陵源

倪

岳

一首

岳字舜咨由錢唐徙上元中天順甲申進士累  
官太子少保吏部尚書贈少保謚文毅有青溪  
集

新春感事

烽火邊城鼓角悲黃沙漠漠北風吹關山遠隔雲中戍  
車馬新屯灞上師賈誼有才思報國杜陵多病尚憂時  
侍臣誰有如椽筆擬撰燕然第二碑

劉大夏

一首

大夏字時雍華容人天順甲申進士選庶吉士  
改兵部郎中歷官右都御史總督兩廣拜兵部  
尚書卒贈太保謚忠宣有東山集

詩話忠宣謀猷是經王室倚賴李景文東山草  
堂歌九重移榻數台見夾城日高未下殿英謀  
密語人不知左右微聞至尊  
羨明良景象百世猶起遐思

送別

離筵酒盡淚霑衣別後憑誰問是非  
午夜夢回明月在天南天北共清輝



姚

綬七首

綬字公綬嘉善人天順甲申進士授監察御史  
謫知永寧縣告歸有穀菴集

詩話吾鄉丹丘先生成化中以侍御謫知永寧  
縣集中永寧有感簡周縣諭詩云孤臣漂泊萬  
山中家住鴛鴦湖水東為縣底須論地僻謫居  
應不笑文窮五株柳樹無端綠一點榴花作意  
紅百八灘頭船可買思尊何必待秋風遂以母  
老辭歸今府縣志但云出知永寧而後人選詩  
集加一府字誤矣吉安秩官表可稽也先生初  
號穀菴居大雲寺之東亦號雲東逸史又自稱  
蘭臺逸史天田老農上清仙吏嬾仙仙癡紫霞  
碧月翁家有振衣亭出乘滄江虹月之舟粉窗

翠幕吹竹彈絲望者以為水仙畫書詩皆逸品  
戶部郎江陰卞榮贈詩云西崦新為墅東橋近  
在垌太常卿同郡呂憲贈詩云兩屐登山輕上  
下一橋分宅作東西尚書烏程閔珪贈詩云松  
徑埽雲招野鶴畫船搖月貫晴虹皆實錄也先  
生吟情甚敏今穀菴集所載不及什一吾宗寒  
中上舍購得先生七律多至二百餘又從書畫  
家儲藏真蹟所見尤不少念遺集為先生手定  
故集外詩  
不多錄云

前有尊酒行

前有一尊酒俎豆亦共之青春未晚日桃李花開時且  
懼娛無刺促尊若空酒再續

有所思

我思不在天上虎豹之九關我思不在海上三神山  
山  
苓芄芄繞晴麓隰榛翳翳沿清灣朝煙散兮雙鶴外夕  
月落兮斷猿間跂予望之心孔殷奈何可望不可攀吁  
嗟西方美人兮何日還

飛龍引

龍不可騎帝騎之鼎湖一去無還時髯拔墮弓五雲裏  
小臣空抱烏號悲飛龍飛龍何不載帝還宛移天宮之

樂來人間勾漏朱砂鍊作丹俾我人人竊服亦得永保  
冰玉顏望龍仰天歌此曲君不見龍來復

溪居

水暖鵝鵲浴花香蛺蝶飛青絲聊繫酒白苧已成衣溪  
閣容蘭漿林深著板扉留賓將薄暮猶待釣魚歸

湖上雜言

桃李漫山白間紅繞湖樓閣晚煙中客船慣向灣頭泊  
不畏波濤夜半風

追次張伯雨韻

春暮雨晴池水添  
夜深池面漾新蟾  
刺桐花影氤氳動  
不省虛亭是隔簾

贈曹竹西畫并題

白下追遊記昔年  
青山如畫樹如煙  
郭家歌舞楊家酒  
一度尋思一悵然

張秦一首

秦字亨甫太倉人  
天順甲申進士選庶吉士授

簡討遷脩撰有滄洲集

李賓之云先生詩縱手迅筆衆莫能及其疑

神注思窮深驚遠一字一句寧闕然而不苟用晚乃益為沈著高簡之辭而盡斂其峭拔奔洶之勢蓋將極于古人而不意其遽止也唐元薦云成弘間藝苑則以李懷麓張滄洲為赤熾而和之者或流于率易

游江詞

仙人天上好樓居  
門外離離種白榆  
一曲洞簫吹向月  
夜深驚起海中鳥

倪輔一首

輔字良弼平湖人天順甲申進士歷官湖廣參政有類劇藏橐

題竹送昌世僉憲四川

春明門外斷秋風  
夢隔煙花紫禁中  
何處竹枝傳別調  
子規殘月在巴東

陳音一首

音字師名莆田人天順甲申進士官至太常寺

卿有媿齋集

重九會白雲觀分韻得然字

長春宮觀鎖寒烟  
駐馬斜陽老樹邊  
白鶴不歸雲影外  
黃花仍放酒杯前  
空餘潭馬王劉像  
莫辨龍蛇虎兔年  
燕子蹉跎重九至  
西風落帽一淒然

沈 榮 一首

榮字元節平湖人  
天順甲申進士  
歷貴州參政  
有頤貞集

再遊清溪



再發扁舟興茲遊不厭重溪山元有約昆弟且相從止  
渚水銜月南皋雲在松誰云秋意晚猶及采芙蓉

閔

珪一首

珪字朝英烏程人天順甲申進士累官少保兼  
太子太保刑部尚書贈太保謚莊懿有集

題翫芳亭

羣芳掩映草亭虛知是元龍舊日居滿地綠陰新雨後  
一簾香霧午風初屏開屈戌春無際人倚闌干畫不如

容我數來閒坐久愛臨流水看芙蓉

明詩綜卷二十六